

gatus Venetias venit: ubi divinis armis usus cælestis vitæ præmia proposuit omnibus, qui arma adversus Ecelinum tyrannum, Romanæ Ecclesiæ hostem judicatum, secum sumpsis-
sent. Premebat is gravi obsidione Mantuam: ad cujus opes evertendas, constituit Philippus loca, quæ ille occupaverat, quibuscunque posset copiis, infestare. Non pauci mortales ad tam piam expeditionem magno præmio evocati, Venetias ad illum confluxere. Sed Venetorum opes rem in primis juverunt. Siquidem præter ingentes copias, quas Philippo dedere, arma, naves, commeatus, & quicquid gerendo bello oppugnationibusque locorum usui futurum putabant, in castra comportandum curarunt: atque ita primum ex Bebiis (in quem locum ut convenirent, edictum erat militibus) mota in hostes castra, Corregiolamque subito admota. Huc Ansedinus, Ecelini ex sorore nepos, Patavii Prætor, cum aliquot cohortibus occurrerat. Is quum ab initio rescivisset, quæ Venetiis facta essent, Brenta fluvio Bachilioneque proprio cursu aversis, stagna, quæ illorum refluxibus circa ea loca fiunt, cohibitis, in proprium alveum aquis exiccanda curavit, ne esset, qua Venetorum navigia exercitum in continentem exponerent. Reddidit res ipsa aliquanto impeditiorem navigationem. Nam ubi ad Corregiolæ ostium ventum est, essetque antiquus alveus pene totus aquis destitutus, ut majora navigia nullo modo ferret, minores lembi lintresque ut adhiberentur, necesse fuit. His sagittarii primo, qui hostes adversam ripam tenentes summovent, inde reliquæ in continentem copiarum expositæ: tum in Saccenses ductum. Horum oppidum Ansedini præsidio, a quo antea erat initum, impigre est defensum. Ravennas Antistes, soluta repente obsidione, quosdam haud procul inde vicos occupavit. Quum hæc Ansedinus rescivisset, confestim oppido Saccensibus relicto, citato agmine Patavium ire contendit: Philippus Venetique, Saccensibus in fidem acceptis, hostem persecuti sunt, sub quorum accessum tam subita oppugnatio Patavium adorta est, ut pene prius ad Pontem curvum pars ejus sit capta, quam omnino oppugnari sentiretur. Ea victoria Philippus Venetique audaciores facti, rursus circa Altinantem portam

1250

Bellum adversus Ecelinum.